

中國方志叢書·華中地方·第七六〇號

據

清·王建中等修，劉繹等纂
清同治十三年刻本

影印

江 西 省

永豐縣志

(一)

成文出版社有限公司印行

本書承

日本國會圖書館以所藏稿本借攝
謹誌並致謝忱

天
地
人
三
才
統
一
之
理

重修永豐縣志序

天下事有未謀其始而竟樂觀其成者不
勞而獲此亦殆有天幸焉永豐自宋至和
初置縣至紹興間邑宰陳侯豐元創輯縣
志由元迄明以逮我

國朝於今凡十修矣同治己巳前尹雙君雲

汀奉憲檄舉其事歷王君小珊黃君立

吾朱君孟延敦聘邑中名士為集貲為採
訪為纂修靡不殫心竭慮以期相與有成
為一邑考獻徵文之助顧以在事諸君子
慎重將事不欲簡率以速其成凡五閱寒
暑至癸酉之冬值余以銓注來宰斯邑下
車伊始而志稿適具因得取其成書次第
披覽幾於余若有相待而使余得受其成

功者不勞而獲幸何如也竊惟邑之有志
非徒存紀載備觀覽已也一邑之志記一
邑之事蓋將於此考地理之夷險而有以
審張弛之宜觀風俗之奢儉而有以慎去
取之用驗民情之淑慝而有以酌寬猛之
施計物產之盈虛而有以參緩急之備以
至為損為益或革或因廢者修墜者舉涖

斯土者無不於茲考證而得所設施則邑志之所繫非淺鮮也余雖不才於治邑之道未有所得然而書之成則於治道深有裨助余之得觀其成而引以為幸者良有以也邑中在籍京卿劉詹巖殿撰方為全省通志總纂而於本邑之志實賴以攬其大綱而正其義例在事諸君子秉筆之

餘要皆實事求是斟酌盡善故其詳審精
密較舊志不啻倍蓰茲將裝訂成帙上之
大府以備通志之採輯爰僭綴數語以明
欣幸之意並誌欽服之忱云

同治甲戌仲春知縣事高郵王建中識



100

縣志後序

永豐縣志稿成既已請序於
邑侯授梓畢功矣於是同事在
局者謂時閱五年官歷數任蓋
成事若斯之難也屬釋書其顛
末於後溯自己巳之秋奉

中丞檄各縣修志庚午夏邑侯
雙公始議設局於城籌費于五鄉
札委各鄉紳士採訪勸捐而城局
則五鄉各舉二人司編纂焉自
是分任其責董成于邑侯奈豐
故瘠貧地復窶遠積時既久而

人不齊心採訪既難勸捐尤不易
因之費繁用絀作輟靡常屢勉
從事始得草創成編藉以稱上
意而完盛舉云云幸矣懷前志
修於道光初歷五十年其時繹泰
分校之列今載典斯役能無文獻

之感乎江西通志之脩承中丞委
任繆領省局自慙荒耄無以少裨
萬一而本郡本邑又疊蒙崇道不
棄必令典閑經數年往返過問曾
不能偕局友詳審參訂心滋慙焉
間閱他縣新志經不越乎省章但

各率其舊體例未能畫一豐志亦
因前脩踵而增之耳方集議時劉
君鳳臺張君脩之各擧例言相示
繹重加參酌均不背於體裁爰合衆
力循序編次其間考訂增續不泛不
濫則張君有勞焉茲得稟承

邑侯重為鑒定釋典諸同事獲親
厥成繼自今足以傳信豈非厚幸歟
同治十三年甲戌仲夏月

舊史官邑人劉繹序并書



舊序

邑令 陳豐元

唐賈耽嗜書尤詳地理四方之人與使外國者必詢風俗以爲輿圖之廣土地之宜吾儒不可不知也已而相德宗參贊輔翊多所發明是地理一書誠爲有補於治道也若夫別九州貢賦則禹貢之篇見於有虞之世辨邦國財用則職方之任見於成周之時在漢則有班固地理志在唐則有貞元十道錄國朝著九域志蓋集郡國圖經聚而成書用以周知天下事物則百里之地圖經其獨可偏廢乎永豐者吉州之屬邑其江山之秀人才之盛戶口之殷稻粱之饒他邑鮮儼自至和改元分吉水縣爲邑迄今百有七年而此書尙缺治政者無所稽考予承乏茲土欲彙爲

成書久矣每以牒訴之喧囂催科之倥傯力不暇給今值
瓜代有期慮復輟於因循爰與諸學士裒輯而編次得四
萬餘言自總序至拾遺析爲十卷目曰永豐志宋紹興二
十九年己卯序

舊序二

邑令蘇升

天下者一邑之積也一邑者一鄉之積也圖記之作自鄉
邑始古者九州之志謂之九邱邱聚也言九州所有土地
所生風氣所宜聚此書也永豐縣志經前宰陳侯纂修獨
遷鶯鄉缺焉宜有以補之而志中歲月有舛訛者亟思有
以正之予忝司厥職嘗曰禹貢爲別九州作也要不過隨
山濬川任土作貢以別其分域等差而已終篇必曰東漸